

Tatus

¹ Ji Pol, ji Itou nomo haruwe magana, onodu ji Yesus Kristus nomo aposel. No ji Itou no nogo nomo fai-aita bagu hangada nigai waha, nebere huwanyanege ngalengawou dangamu nagi boni, beeble ngalenga waha isou tei nomo hoyo nigi boni, nere Itou nomo onowou oojowei nomo bona huuru hiyainga goyene. ² Ji nere huwanyanege danga bagu ngalenga wogunga Itou no nere age-nege auma gai-gai yafou nigonbona waha itari tuwodbode hoyo nigou haruwe teni. Gai amina langa, saini Itou no dada ete tafainga heigei uwa inyi gainga, no ere agege auma yafou waha higei nomo bona lewai. Onodu Itou no beeble ada yaawa-yaawana. ³ Onodu bona iinga gainga, saini no nogo hangadawai waha langa, no nomo beeble malalamudu lewei nomo bona fai ila jaimu nigai, ono wainga onowou waha langa no nomo beeble ono wainga malala heigai. Itou ere ege gidu haigou Fai no lewainga, ji beeble malalamudu lewei nomo haruwe waha teene.

⁴ Tatus, ji pas beha ne yerege hanini. Ne yame magana tigini, onodu ne name huwanyate ngalengawou waha, ere oruwanga ebere huwanyage ngalengawou inyina dorofenga. Jijei Itou, Yesus Kristus no, ere ege gidu haigou fai ngare edo langa ne bodere augami nironga name huwanyate ono hanoronga foinga inyonbona.

Tatus no sios nomo mora bagu hilobainga hangada nigonbona.

⁵ Ji amina ne Krit nuuya langa awa hini boni lehinene onou, ne haruwe matau-matau oruwanga tiginiwei uwa waha tiginimu bonahe, taon oruwa langa sios inyina waha nebere mora bagu hangada nigau. ⁶ Ne fai nere fai-aita agenege langa nyabuluwou uwau onodu, nere fai waha aita etenga tou wahanga hangada nigau. Onodu fai waha nebere magana nere Kristus bode huwanyanege ngalenga wogu, nere Itou ago langa onowou jijiga bagu waha adai oojo wogu, nere nebere amenege anyanege gane nebere beeble feiya bode honyonyodu golowou fanyimu waha adai oojo wogu. ⁷ Ne isini, sios nomo haruwe fai no Itou nomo haruwe oofa fugou fai. Onou waha bona no tigini golode gonga, nere fai-aita bagu no langa nyabuluwou te ada urodbode. No benou adai isou, Ji unyife anyakaro bagu idu fai-aita kejiwe adai ono nigona. No houmu fasadu adai mayou. No adai sipak wona. No fai kejiwe adai narigona. No moni dada baingaro elegei nomo bona adai gau tuwou. Uwa. ⁸ No fai nomo mata langa maide waha oofade nigona. No onowou hilobainga oruwa gau tugonga no ninau isou hilobainga wahanga oojo wona. No fanyimu hilobainga oojo bona Itou nomo onowou hilobainga oruwa oojo wona. Ono bona no nogo nomo ago auma yafou oofa dewona. ⁹ No ngalenga beeble bona isisiwou tuwane waha danga bagu yaasu wona. Ono bona no edo langa fai-aita ngalenga beeble waha huwanyanege ngalengawei nomo isisiwou nigi bona, no edo langa beeble waha tigini oojowei nomo huwanyanege jaimu nagonbona. Onodu

no fai nere feetode waha edo la danga bagu lenigonga, nere nebere nyabuluwou bode isi dewodbode.

Krit nuuya langa fai baingaro nere fai ila nebere huwanyanege ngalengawou inyabamu nagane.

¹⁰ Tatus ne oofa nigou fai hilobainga hangada nigau, taate bona, Krit nuuya nomo sios langa fai baingaro nere beeble feiyagou yafade. Nere beeble baingaro ewe lebode fai nebere ninanege yaawa nagi-nagide. Nere fai toomaro waha nere Juda ganenege, fai waha nere fai genege gala karu nagei nomo danga tafa-tafade. ¹¹ Nere fai waha onowou inyaba ono bode fai-aita nebere moni dada kuse nagei nomo ono-onode, onou waha bode fanyimu ere onowei nomo edo uwa waha nere onowei nomo isisiwou nigi-nigide. Ono ganenga onowou waha langa fai-aita nebere magana gane bagu huwanyanege ngalengawou inyabamu nagi-nagide. Onou waha bona ne beeble onouha waha adai lewei nomo bonahe nere karu nigau. ¹² Amina Krit nuuyaha isou fai ete no benou lewai, “Krit nuuyaha fai nere yaawa ham-bawou. Nere fai gai inyaba kaafa kui dorofe. Nere hogonyi tai bode da baingaro nyei nomonga ninanege isi iside.” ¹³ Beeble beha no ngalenga. Onou waha bona ne nebere onowou tiginimu dedu nere Itou bode huwanyanege ngalenga dewodbode waha bonahe, beeble danga bagu lenigau. ¹⁴ Ariya, nere Juda nebere aasa hogo fere-fere ewe haide waha bagu, fai nere ngalenga beeble moge tubode nuuni beeble hogo fere-fere lede waha ise i nomo agenege kuli adai tafogu.

¹⁵ Nere fai-aita nage Itou ago langa jijiga uwau yafa bode wonga, da dada fere jijiga uwau, nere dabu elegode. Ariya nere fai-aita bagu Itou ago langa onowou jijiga bagu waha oojo bode, nere Kristus bode huwanyanege ngalenga wegu uwa wonga, dada ete no jijiga uwau te uwau, taate bona, nere nebere huwanyanege ninanege bagu Itou ago langa oruwanga jijiga dewou. ¹⁶ Nere huranege langa benou le-lede, “Ji Itou boni isini,” Ariya nere nebere onowou abitimuna wa benou, nere Itou amina moge tuwane. Itou no nere tigini gau nigei uwa. Nere beeble feiyagou fai, onou waha bode nere onowou hilobainga ete te adanga ada ono wodbode.

2

Umura nere onowou Itou gau tuna waha oojo dewode.

¹ Ariya ne fai-aita bagu le nigahenga onowou Itou nomo beeble oruwanga lena onou tigini oojo wode. ² Ne fai umura lenigahenga adai sipak wode. Nere fanyimu onode waha bode ninanege iside bode ninanege isou hilobainga wahanga oojo wode. Nere Itou nomo beeble ngalenga bagu, fai ila gaude nigei nomo fanyimu bagu, nere danga bagu oto bode ou oruwanga aulei nomo fanyimu bode isi dewode.

³ Ariya ne aita umura fere lenigahenga nere onowou Itou gau tuna waha langa golo wode. Nere ila beeble inyaba adai lenigogu. Nere wain yaage adai awa tuwogunga nebere ninanege oofa nagona. Nere ila onowou hilobainga onowei nomo isisiwou nigogunga, ⁴ nere aita magana

nere nebere fai magana bagu gaude nigei nomo fanyimu isi dewodbode. ⁵ Onodu aita magana nere nage nebere ninanege oofade bode Itou ago langa jijiga uwau yafodbode. Ono bode nebere mata oofa dewe i nomo fanyimu bagu, nebere fai magana gane bagu oofa nigei nomo fanyimu bagu, nebere fai nebere huuna langa yafei nomo isodbode. Nere fanyimu onou onowei mata wogunga, nebere fai nere Itou nomo beeble, beeble inyaba ada letuwodbode.

Taitus no onowou hilobainga ono wonga, nere magana gila edo oojo wodbode.

⁶ Onou dorofenga, ne fai menanga giila waha jaimu nigahenga, nere fere nebere fanyinege oofa dewode. ⁷ Ne dada oruwanga ono-ononi waha, ne nage onowou hilobainga wahanga ono wahenga, fai nere edo name onowou waha uredu bode oojo wodbode. Ne name fai-aita bagu isisiwou nigei nomo haruwe langa, ne adai yaawa nigau, ne jija beeble lenigi bonahe adai edegawau. Uwa. Ne gai-gai onowou tigini wahanga bonahe ninate iside bonahe beeble tigini waha malalamudu lenigau. ⁸ Ne beeble tigini wahanga lewei mata bonahe wonga, fai nere nyabuluwou te ada toroba wodbode. Onodu honggoro fai nere beeble inyaba ada lehigodbode. Nere nebere ninanege isou inyaba waha bode mayau nigonbona.

Nere haruwe magana, hoobu fai nebere beeble oojo dewogu.

⁹ Ne haruwe magana benou lenigau, Nere nebere hoobu nebere huuna langa yafa bode, nere haruwe hilobainga hogo fere-fere nebere

hoobu gau nigona waha tote. Nere nebere hoobu beeble inyaba ege adai gidu lenigi bode,¹⁰ nebere dada adai yebu wode. Nere hoobu fai nebere beeble oojo dewogunga, hoobu fai nere nebere onowou waha bode edega dewode. Onou waha bona nere dada oruwanga onode waha langa, haruwe magana nere fai ere beeble malalamudu leleya waha unyi anyakaromuwei nomo jaimu nigodbode, wa Itou nomo beeble ngalenga waha, no eege gidu haigou Fai.

Ere Itou nomo onowou oojo boyo, Kristus nomo Fati anyakaro itariwei nomo.

¹¹ Ere isiya, Itou nomo aau warou no malala heigai, onodu no edo langa fai-aita oruwanga ege gidu hanigonbona. ¹² Itou nomo aau warou waha no ere Itou adai moge tuwei nomo onodu oula beha nomo gauwou inyaba oruwa awei nomo bona isisiwou higina, ono bona no ere ninage iside boyo tigini golo deweui nomo isisiwou higina. Ngalenga, ere oula beha nomo fai-aita gamanege langa yafaya, ariya Itou nomo aau warou no ere nomo onowou oojowei nomo isisiwou higi bona ¹³ ere huwanyage danga bagu ngalenga wonga, dada hilobainga ere edega boyo urei nomo itari woboya. Ere Jesus Kristus itari tuya, no Itou danga bagu, no ere ege gidu haigou fai, no mujari hilobainga bagu lala anyakaro bagu Itou nomo danga bagu malala heigondona. ¹⁴ Kristus no ere ege gidu haigei nomo bona bagu, ere ebere une oruwanga uulu hagei nomo bona bagu, ere jijiga uwaunga uwau heigedu no nogo nomo fai-aita yafa boyo onowou hilobainga hogo fere-fere

ono boyo haruwe danga bagu tei nomo ago auma yafou awai.

15 Ariya, ne gai-gai beeble beha nere fai-aita bagu lenigau ganga. Ne nere beeble beha oojowei nomo jaimu nigi bonahe, nere fai-aita bagu beeble feiyagou waha nebore onowou tiginimuwei nomo beeble danga bagu lenigau. Ne fai adai awa nigahenga name beeble inyabamu hanogu.

3

Itou no ere hilou tafa higi dewai bona ere fanyimu hilobainga onowei nomo.

1 Ne fai-aita bagu lenigahenga nere king bagu gabman bagu nebore huuna langa yafabode nebore beeble oojo nagode. Ono bode nere gai-gai haruwe hilobainga hogo fere-fere oruwanga tei nomo haiya wode. **2** Nere fai ete beeble inyaba adai letubode beeble langa adai wara wogu. Nere gai-gai foinga yafa bode fai-aita oruwanga hilou tafa nigode.

3 Ne isini, ere fere amina ninage isou hilou uwau waha boyo ere beeble feiya geye. Satan no ere yaawa higainga ere Itou nomo jala oojowei uwa. Wa benou, ere ewe huwanyage jayei nomo fanyimu hogo fere-fere bagu geege gala nomo gauwou hogo fere-fere nebore haruwe magana yafeye. Ere huwanyage langa houge mai guru boyo ilibage gane boyo huwanyage inyaba guruwou fanyimu langa golo weye. Nere fai ere honggoro fai tafa higanenga ere etenga-etenga nere ila honggoro fai tafa nigeye.

⁴ Ariya Itou ere ege gidu haigou fai, no ere gaude higidu bona aau warainga onowou hilobainga ono higai. Ariya saini nomo onowou hilobainga waha malala heigainga, ⁵ no ere ege gidu haigai. No ere hage onowou hilobainga ono weyenga waha isidu bona ere ege gidu haigei uwa. No nogo nomo augami tuwou langa ere ege gidu haigai. No ere bisemu higainga ere magana momodo dorofe heigeyenga, Hauri Guuni no agege auma yafou ege higai. ⁶ Ere ege gidu haigou fai, Yesus Kristus nomo haruwe langa, Itou no Hauri Guuni nomo danga inyangaro ere langa feuna. ⁷ Kristus no ere bona aau warainga, no ere ono higainga ere Itou ago langa fai-aita tigini heigeye, ono weyenga onowou waha langa fai-aita Itou no ere agege auma yafou tedu boy a gai-gai yafei nomo bona hangada higai, agege auma yafou waha ere itari boy a yafaya. ⁸ Ere beeble beha boy a edo huwanyage ngalenga dewonbona.

Ji ne dada beha bonahe beeble danga bagu malalamudu lewei nomo gau hina, ono wahenga fai-aita nere Itou bode huwanyanege ngalengade waha nere edo onowou hilobainga onowei nomo haruwe danga bagu todbone. Ariya onowou onouha waha no fai-aita hoyo nigi-nigina, onodu no dada tigini. ⁹ Ariya ne fai nere honggoro beeble lebode beeble langa warawei nomo gaude nigi ganga nere nebere asanege gane nebere un-yinege bode beeble lebode nere Moses nomo nuuni beeble nomo hugu bode beeble langa warade waha nebere honyoyowou beeble ise i nomo agetege kuli adai tafau. Ere alai, beeble onouha waha no ere onowou hilobainga oojowei nomo ada hoyo

higonbona. ¹⁰ Ariya fai ete no sios fasakawei nomo fanyimu ono wonga, ne nomo ninau tig-inimuwei nomo beeble letuwau. Ariya ne onou ono etenga yo, ngawei mata wahenga, no name beeble ise iwa wonga, ne awa tudu bonahe moge tuyangawau. ¹¹ Ne isini, fai onouha waha no jala awadu bona, une tafagou fai heigai. Ono wainga no nogo nomo une waha we no kot langa tafa tuwai.

Tatus no maidu Pol uronbona.

¹² Saini ji Artemas yo Tikikus huuru tuwehenga ne bagu mayonga wa, ne ji bagu Nikopolis taon langa mayei nomo danga tafau, taate bona, oto nomo saini bagu karaga anyakaro nomo saini langa ji Nikopolis taon walanga yafonboni. ¹³ Ne nuuni beeble isou fai, Apolos Senas ngare oofade nirau. Ne neire jala golowei nomo dada bonahe hoyo nirau, ono wahenga neire jala golowou langa dada ete bodere ada tutu nironbona.

¹⁴ Ere ebere fai-aita nere fai-aita ila dada bode tutu nigina waha hoyo nigei nomo haruwe hilobainga tei nomo fanyimu bode isou tote. Gamaji nere Kristen ewe yafa bode Itou nomo onowou ada oojo woguga.

¹⁵ Nere fai-aita oruwanga ji bagu yafade waha, nebere kaiyewou ne langa huurude. Ariya ne ebere kaiyewou nere fai-aita Jesus bode huwanyanege ngalengawou ere gau higi-higide waha nigau.

Itou nomo aau warou edo tere oruwanga la inyou.

**ITOU NOMO HILOU BEELE
The New Testament in the Ogea language of Papua
New Guinea
Nupela Testamen long tok ples Ogea long Niugini**

copyright © 2013 Wycliffe Bible Translators, Inc.

Language: Ogea

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-12-01

PDF generated using Haiola and XeLaTeX on 11 Nov 2022 from source files
dated 28 May 2022

f639c3d8-02b7-508f-ba13-8a2c18c0e533